



# Պարույր Սևակ

## Ութնյակներ

Մաս 4

31

Բավական է  
Ասես «ջանիկ»՝  
Իրեն կզգա  
Նա երջանիկ...  
Վա՛յ քո խելքին,  
Վա՛յ քո երգին,  
Վանդակ ընկած  
Դու դեղձանիկ...

32

Նա սուտ է փշում: Թե սուտը բռնես-  
«Որսորդ եմ» կասի:  
Անհամի մեկն է: Ասես՝ անհամ ես-  
«Նոր սորտ եմ» կասի:  
Մարդ է սպանել: Ու եթե բռնես  
Հանցանքի տեղում՝  
Էլի՛ կգտնի արդարացումը.  
«Հերստտ եմ» կասի:

33

Հետըդ «ուռա» բերեցիր  
Եվ ի՞նչ - միայն «վայ» տարար,-  
Ուղղրաժըդ՝ համարիչ,  
Ջուր ցրաժըդ՝ հայտարար:  
Ինքըդ հաշվիր, թվաբա՛ն,  
Թե ի՞նչ մնաց քանորդում.  
Մի մանրացո՛ղ կոտորակ...  
Տե՛ղն է անբան շանորդուն:

34

Թե նա մի քիչ վատ է զգում՝  
Թեթևակի հիվանդանում,  
Վայնասուն է զգում իսկույն,  
Ո՛նց է սուգ ու շիվան դնում:  
Իսկ դու - կեցցե՛ս. Հրո երկիր,  
Թե Սառուցյալ օվկիան ընկիր՝  
Միևնույնն է, զգում ես քեզ  
Բարեհուստ հիվանդանում:

35

Գրաբար բառ է. այդ ի՞նչ ասել է  
«Դաստիարակել», -  
Եվ հասկանում է նա էլ յուրովի՝  
«Ղաստի վարակել»:  
Անձանոթ բառ է նաև «կրթելը»,  
Բայց նա կրթում է,  
Եվ ստացվում է նո՛ւյն բանը կրկին.  
Շա՛տ լավ կրտում է:

36

Շնախոտ լինի,  
Թե գինձ ու կոտեն՝  
Ինչ էլ տալիս են,  
Ասում է՝ կոտեն:  
Մարտոդությունը  
Ասենք թե սուր է,  
Բայց, խելքի՞դ մեռնեմ,  
Բա խե՛լքըդ ուր է:

37

Աչք մտնողը աչքի ընկավ՝  
Աչք կհանի...  
Աչքալույս տաս՝ աչքի լույսն ես -  
Աչքով կանի.  
Աչքիդ չընկավ՝ աչքի փուշն ես -  
Այնուհետև՝  
Քեզ նայելու աչք էլ չունի  
Չորսաչքանին:

38

Գործի գլուխ ես՝  
Գլուխդ է տանում,  
Գլխիցդ էլ դուրս տաս՝  
Գլխով է անում:  
Գործից հանեցի՞ն՝ -  
Էլ գլո՞ւխ կտա...  
Իր գործից լավ է  
Նա գլուխ հանում:

39

Ինքն էլ գիտի, որ գործից  
Բնավ գլուխ չի հանում,  
Բայց արի տես, որ հիմա  
Գործի գլուխ է դարձել:  
Իր այդ բարձր պաշտոնով  
Ոմանց խելքից է հանում,  
Սակայն շատ ու շատերին  
Նաև խելքի է գցել:

40

Գլխի է ընկել.  
Գլուխ է պահում՝  
Այստեղ ու այնտեղ  
Գլուխ տանելով:  
Գլխի է ընկել.  
Գլուխ է յուզում՝  
Գլխավորներին  
Գլխով անելով: